

MESHAPUSH

Etuat Rich

Eukuan tshe atanutsheian.

Ek^u anite etutet naneu, uapameu namesha, mishta-mitshetinua. Kuetu tutueu, apu tshi nipaiait. At tshikakuateu mani, muk^u apu tshi nipaiait. Ekue tshiuat.

— Nukum, iteu, apu tshi nipaikau anite nameshat, mishta-mitshetuat.

— Tau anite nussim, itiku, anapitsheu enik^u. Eukuan muk^u tepishkaniti ek^u ianapitshet. Apu tshi uapamakanit an ianapitsheti, tepishkaniti ek^u ianapitshet.

— Nete nika natuapamau, iteu.

— Tshika nipaik^u, itiku.

— Mauat apu tshika tshi nipait.

Niatat, auennua uitshinua tapue. Uet unuiht ishkuessat.

— Natuapamek^u uissitak^u, iteu uetakussinit. Eka uin peshuek^u uapushitak^u.

— Eshe, itiku.

Tapue tshatuteht anitshenat ishkuessat, pietutaiht nenua uissitakua. Ekute anite etat ne Uapush, nenua uissitakua. Katshi

tshituteht, ekue anapitshet. Uiapamat ianapitsheniti tepishkanit.

Ek^u uenuipaniut.

— Shash tshitshi tshissinuapamitin, iteu, etanapitshein, etapekaut tshitanapi.

At ututamueu enik^u, apu katsheshtauat. Ekue unuipataniti. Tshauapatat ek^u.

— Uashkashape, pishakanapi tuta, iteu ek^u ukuma.

Ek^u uiashkashapepanit ne ishkieu, kukuminash. Katshi uashkashapet ne kukuminash, ekue anapitshet Uapush, anapitshepanu. Katshi anapitshet ekue nipaiaat namesha tapue. Mishta-mitshetinua namesha nepaiaat.

— Apu takuak mukuman, iteu ne kukuminash. Tau anite kaiassikumanitshesht. Tshipa tshi minik^u natuenitamuti assikumana tshetshi mukumanitshein.

— Eshe, iteu.

Tshatshipatat tapue. Uiapamat auennua pemuteniti.

— Peta ma, mini assikuman, iteu, nui mukumanitshen.

Ekue minat ne kaiassikumanitshesht, papatshishekushinu nenu mineu. Ek^u tshauapatat. Ek^u apu tshi uinameshet eshk^u, usham papakashinu nenu, uakapissinam^u mani nenu at ua uinamesheti.

— Mauat apu minuat au, iteu nenua ussima. Etatu menuanit kanuenitam^u an. « Apu minuat », tshe itat.

— Eshe, itiku.

Minuat tshatshipatat Uapush, niatat.

— Apu minuat au ka minin, iteu, uauakapissipanu.

— Apu tshi minitan minuat, itiku, nitapashtan au tanite nenua assikumana.

— Eshe, iteu.

Tshauet ek^u, ekue tshiuapatat nete kau. Ek^u anite ushpishkunnit uet natat, pemushinatauat, keutauat ne, uetshipitamuat nenu utassikumannu, tshauapatuat nenu menuanit, eukuannu tapue. Ek^u

ne uiashkamenimut, apu takuannit nene utassikumanim ne kaiassikumanitshesht.

Minuanu ek^u umukuman. Tutamupanu mukumannu, ek^u uanameshet tapue.

Katshi uinameshet, apu tshi piminuet ek^u, apu takuannit ishkutenu.

— Nika natshi-ishkutuen, iteu nenua ukuma.

Utanapia takuneu, ek^u anite etutet matshiteu, ek^u nekamut : « MISH-TA-A-ME-KU-TSHI-I-KU-MISH-TA-A-ME-KU-TSHI-I-KU-A-SHI-UA-KU-MU-U-KU-MISH-TA-A-ME-KU-TSHI-I-KU », itueu. Ekue

ne ashakumuat tapue uapamekuat, ashakumuat neka ite akamit.

— Eka ui kassipishinan. Nika kutapaniunan uesh kassipishiati, iteu ne uapamek^u.

— Eshe, itiku.

Tapue teshkamipatat ek^u. Uauikuekashepaniu, tatakussepanishu anite. Nete tshekat nenua mashten kassipiteu ekue kutapaniuniti. Kutapaniunua ekue kapat nete. Ekute ekuaukushit, akuaukushu anite uinipekut.

Anite tshimatenu mitshuapinu pessish, mishtikussuapinu,
ek^u anite pepamuteht ishkuessat. Auennua uapameuat, akuaukunua nenua
Uapusha, tshekat nipinua shash.

— Aaa, iteu, tshe metuatsheiak^u ! Tshiuetaiatau !

Ek^u tshauetaiaht tapue nenua.

— Nuta, iteu, nipeshuanan ne aueshish. Nika metuatshenan.

— Mauat, nipaik^u anite, itiku nenua utauia. Meshapush an etshe.

— Namaieu an, iteu. Etatu an tshipa mishishtu Meshapush.

Ek^u tapue piashuaht anite, nete katshishapissiteshit pessish aneuat. Ek^u
piashut ne Uapush. Tshek ekue nakataht anite e patshituaht. Nakateuat anite,
shash aiatshishinua. Ek^u sheshkauat nenua utanapia. « Tshima pakushut nitanapi
», itenimeu. Ek^u piakushuniti nenua utanapia, ute shekutikuameshu. Ekue
ishkuteushiniti, uenuipatat.

Tshauapatat an. Tatakussepanu uapamekua, nenua ma mashten
kassipiteu. Ekue kutapaniuniti kassinu etashiniti.

— Tshikassipitikunan ! itakanu.

Eukueka kuetapaniuniti kassinu. Ekue kapapatat, tshiuapatuat nenu
utishkudem.

— Shash nimishken ishkteu ! iteu ukuma.

Kuetuet ek^u, peminuet ek^u, mimimitshishu, matshishut ek^u. Katshi
mitshishut tapue ekuan, shash tanite utishkudemu an.

Eukuan uet takuak ne ishkteu inanu, ne kassinu ishkteu. Uapush nenu
tutam^u. Apu ut takuak ute tshinanu ishkteu ueshkat, muk^u nete katak^u
takuanipan.

